

ás ensinanzas universitarias oficiais de grao do sistema universitario de Galicia mediante a superación dunha proba de acceso. Poderán concorrer á proba de acceso as persoas que cumpran os 25 anos de idade antes do día 1 de outubro do ano natural en que se celebre a proba.

2. O sistema universitario de Galicia realizará anualmente unha convocatoria da proba de acceso para cada unha das ramas en que oferten ensinanzas.

3. Aos candidatos e candidatas que realicen esta proba no sistema universitario de Galicia correspóndelles preferentemente, para efectos de ingreso, aquelas ensinanzas universitarias ofertadas polas súas universidades.

4. O alumnado deberá realizar a fase específica na opción da súa elección, correspondéndolle preferentemente, para efectos de ingreso, aquelas ensinanzas universitarias ofertadas polas universidades que estean vinculadas a cada unha das opcións, de acordo co establecido no anexo VI desta orde.

A adscrición preferente ás ramas de coñecemento das ensinanzas universitarias oficiais de grao do sistema universitario de Galicia para as opcións da proba de acceso á universidade dos maiores de 25 anos, regulada por normativas anteriores, recóllese no anexo VII desta orde.

5. A proba de acceso estrutúrase en dúas fases: fase xeral e fase específica.

6. A fase xeral ten como obxectivo apreciar a madurez e idoneidade dos candidatos para seguiren con éxito estudos universitarios, así como a súa capacidade de razoamento e de expresión escrita.

7. A fase xeral comprenderá os catro exercicios seguintes:

a) Comentario dun texto ou desenvolvemento dun tema xeral de actualidade.

b) Lingua castelá.

c) Lingua galega.

d) Lingua estranxeira, que se elixirá entre alemán, francés, inglés, italiano ou portugués.

O alumnado poderá solicitar a exención do exercicio de lingua galega no impreso de matrícula. A CIUG comunicará aos candidatos ou candidatas, por correo ordinario e con aviso de recepción, a concesión ou non da exención do exercicio de lingua galega.

8. A fase específica terá por finalidade valorar as habilidades, capacidades e aptitudes dos candidatos para cursaren con éxito as ensinanzas universitarias vinculadas a cada unha das ramas do coñecemento arredor das cales se organizan os estudos universitarios oficiais de grao.

A fase específica estrutúrase nas cinco opcións seguintes, vinculadas coas cinco ramas do coñecemento:

Opción A: Artes e Humanidades.

Opción B: Ciencias.

Opción C: Ciencias da Saúde.

Opción D: Ciencias Xurídicas e Sociais.

Opción E: Enxeñaría e Arquitectura.

O alumnado escollerá no impreso de matrícula unha opción da fase específica.

9. A fase específica constará de dúas materias obrigatorias para cada opción, que serán as que se sinalan a continuación:

Opción	Materias obrigatorias
A - Artes e Humanidades	Historia da arte Xeografía
B - Ciencias	Matemáticas Química
C - Ciencias da Saúde	Bioloxía Química
D - Ciencias Sociais e Xurídicas	Historia do mundo contemporáneo Matemáticas aplicadas ás ciencias sociais
E - Enxeñaría e Arquitectura	Física Matemáticas

Ademais, constará dunha materia optativa que o alumnado deberá escoller no momento da matrícula entre as materias que se ofertan para cada opción:

Opción	Materias optativas
A - Artes e Humanidades	Debuxo artístico Latín Literatura universal Volume
B - Ciencias	Bioloxía Ciencias da terra e ambientais Física
C - Ciencias da Saúde	Ciencias da terra e ambientais Física Matemáticas
D - Ciencias Sociais e Xurídicas	Economía da empresa Literatura universal Xeografía
E - Enxeñaría e Arquitectura	Ciencias da terra e ambientais Debuxo técnico Química

10. Cada un dos exercicios da fase xeral e da fase específica terá unha duración máxima dunha hora e media. Establecerase un intervalo mínimo de 30 minutos entre o final dun exercicio e o comezo do seguinte.

11. Os candidatos poderán empregar, á súa elección, calquera das linguas oficiais da Comunidade Autónoma de Galicia para a realización dos exercicios. Non obstante, os exercicios correspondentes a lingua castelá, lingua galega e lingua estranxeira deberán realizarse nos seus respectivos idiomas.